

Polis banteras sindiket proses cecair rokok elektronik bercampur ganja

Vape bercampur dadah merebak

Oleh AZZMAN ABDUL JAMAL

KUALA LUMPUR — Penangkapan tujuh individu termasuk seorang pelajar universiti awam yang disyaki dalam kegiatan memproses dan menjual cecair vape mengandungi ganja di Selangor pada Isnin lalu membongkar mengenai kegiatan sindiket itu yang kini sudah merebak di negara ini.

Pengarah Jabatan Siasatan Jenayah Narkotik Bukit Aman, Datuk Seri Mohd. Mokhtar Mohd. Shariff berkata, penangkapan suspek yang terdiri daripada empat lelaki dan tiga wanita berusia antara 26 hingga 39 tahun menjadi titik mula usaha polis mengekang ketagihan dadah menerusi cecair vape.

Menurut beliau, polis akan terus melakukan tangkapan ke atas suspek-suspek lain yang terlibat memproses cecair vape mengandungi dadah dan dijual kepada penghisap rokok elektronik. “Berdasarkan tangkapan pertama berkaitan cecair vape



MOKHTAR (dua dari kiri) menunjukkan barangan rampasan termasuk cecair vape bercampur ganja pada sidang akhbar di Ibu Pejabat Polis Bukit Aman semalam.

bercampur dadah Isnin lalu, polis percaya ini bukan satu-satu sindiket yang memproses cecair vape dengan ganja,” kata beliau pada sidang akhbar di Bukit Aman di sini semalam.

Justeru, kata Mokhtar, polis sedang membuat risikan dan memburu sindiket-sindiket lain yang melakukan aktiviti sama untuk mengaut keuntungan.

“Sindiket yang ditangkap di Selangor didapati menjual bara-

ngan terlarang itu secara online dan COD (*cash on delivery*),” kata beliau sambil memberitahu, polis masih menyiasat pasaran cecair vape bercampur ganja dijual.

Menjelang lanjut Mohd. Mokhtar berkata, sindiket di Selangor itu didapati memproses barang terlarang itu dengan memasukkan kira-kira dua atau tiga titik cecair ganja ke dalam botol cecair vape berkapasiti 15 mililiter (ml) sebelum dijual pada harga RM80

sebotol.

Dalam serbuan sama dilakukan Pasukan Taktikal Khas Perisikan Narkotik (STING) Bukit Aman itu turut berjaya merampas sebanyak 214 botol cecair vape bersamaan 3,210ml dan 7.1 kilogram daun kering disyaki ganja dianggarkan bernilai RM38,000.

Serbuan selama empat jam di sekitar Selangor pukul 6.45 petang itu bermula di Banting, Kelana Jaya dan Ampang. Serbuan



SEBAHAGIAN cecair vape bercampur ganja yang dirampas dalam serbuan dan tangkapan di Banting, Ampang dan Kelana Jaya pada Isnin lalu.



KERATAN Kosmo! semalam.

di Bandar Makhota, Banting berjaya menahan dua individu dan merampas 200 botol disyaki mengandungi cecair ganja.

Polis kemudian menyerbu se buah unit kondominium di Ampang dan sebuah rumah teres satu tingkat di Kelana Jaya dan berjaya menahan dua pasangan suami isteri serta seorang lagi ahli sindiket.

Polis turut merampas sebanyak 14 botol cecair vape mengandungi ganja serta peralatan memproses barang terlarang itu bersama lima suspek di Ampang dan Kelana Jaya.